

štyrjoch lětach serbska Boža služba w Khołmje sama wot so přestanje.“ Džělało je drje so na to hižo dołho.

Fararjo: 1. Łahoda, † 16. aug. 1871; 2. O. Mrózak 1872—1875; 3. Haeseler (přir. Radšow).

Šula: W šuli so po jenej powěsći wot 20, po druhej wot 40 lět wjacy njewučiči. W džěčoch je serbskosć potupjena. Před něšto lětami wučer Malink serbske modleřske w šuli poskićoše a wot 130 džěči so jenička holčka skónčnje wo nje zamołwi.

XXVII. (37.) Wukrančičanska starolutherska wosada.

Do Wukrančičanskeje starolutherskeje wosady słušeju lutherscy z Wukrančic, Duboho, Zubornicy, Hornich Brusow, Hbjelska, Malećic, Boršće, Delnjeje Wólšiny a Lipinkow. Serbski a němski kemš dzerži so kóždu njedželu, serbska spowědž kóždu 2., němska kóždu 6. njedželu, jenož tutu 6. njedželu je němski kemš prjedy serbskeho. Tuto zarjadowanje wobstoi wot spočatka wosady 1843. Serbskich kemšerjow přikhadza kóždu njedželu w přerězku 200—300, němskich 25—40. Paćeřska wučba je zhromadna, z džěla serbska, z džěla němska.

Fararja běchu: 1. Gossner; 2. Jan Kilian, * 1811, přeni statny duchowny 1847—54, čehnješe do Texasa, † 1884 w Serbinje; 3. Vincenc Klein z Čech; 4. Gotthold Albert; 5. G. A. Gumlich, * 1828 w Hagenawje w Šlezskej, 1855—62, woteńdže do Barlina jako professor na Friedrich-Wilhelmgymnasium; 6. Albert Ebert z Drježdžan, 1862—65, prjedy starolutherski farar w Delsku p. Khoćebuza, potom w Hrodzišću; 7. A. Jul. Greve, * 3. měrca 1832 w Gütersloh, 1865—75, woteńdže za fararja do Düsseldorfa, nětko docent w Wrótšlawju; 8. Matej Urban, * 13. jul. 1840 w Turjom, wot 1875. Z tutech duchownych su druzi a posledni rodž. Serbaj, druzi rodž. Němcy, kotřiž pak wšitcy serbski nawuknuchu a přédowachu.

Šula we Wukrančicach: do njeje khodza wšitke džěči z Wukrančic, a starolutherske z Duboho, Zubornicy a Brusow. Tale starolutherska šula bě w započatku privatna, dosta pak l. 1868 zjawnosć, a wot toho časa su tež krajnocyrkwinske džěči z Wukrančic do njeje připokazane. W njej trjeba so we wšěch třoch wotrjadach, wosebje w třećej, při rozwučowanju nabožiny tež serbska řeč, a wuknu wšě serbske džěči (z wuwzacóm krajnocyrkwinych do Radšowskeje wosady słušacych) katechismus, bibliske hrónčka a kěrluše we swojej řeči. Tež so w 1. a 2.